

摘藻堂四庫全書薈要

集部

欽定四庫全書薈要卷二萬三百二十七

集部

宋詩鈔卷七十四

內閣中書舍人吳之振編

楊萬里南海集鈔

庚子正月五日晚過大臯渡

霧外江山看不真只憑雞犬認前村
渡船滿板霜如雪印我青鞋第一痕

危沙崩岸欲侵牆直下清江百尺強
過了筍輿元未覺

忽然回首冷思量

之官五羊過太和縣登快閣觀山谷石刻

廬陵山水說西昌天遣金華印此邦詩本道他將取去
如何遺下一澄江

萬安道中書事

玉峰雲剝逗斜明花徑泥乾得晚行細細一風寒裏暖
時時數點雨中晴

攜家滿路踏春華兒女欣欣不憶家騎吏也忘行役苦

一人人插一枝花

過皂口

贛石三百里春流十八灘
路從青壁絕船到半江寒
不是春光好誰供客子看
猶須一樽綠併遣百憂寬

曉過皂口嶺

夜渡驚灘有底忙
曉攀絕磴更難當
周遭碧嶂無人迹
圍入青天小冊方
半世功名一雞肋
平生道路九羊腸
何時上到梅花嶺
北望螺峰半點蒼

步過分水嶺

路險勞人役，僂須下轎行。
石從何代落，蕨傍舊根生。
古樹無今態，幽泉有暗聲。
只言章貢近，猶自兩三程。

憩分水嶺望鄉

嶺頭泉眼一涓流，南入虔州北吉州。
只隔中間些子地，水聲滴作兩鄉愁。

嶺北泉流分外忙，一聲一滴斷人腸。
浪愁出却廬陵界，未入梅山總故鄉。

社日南康道中

東風試暖却成寒
春恰平分又欲殘
淡著煙雲輕著雨
近遮草樹遠遮山
人行柳色花光裏
天接江西嶺北間
管領社公須竹葉
在家在外匹如閒

小溪至新曲

人煙懔懔不成村
溪水微茫劣半分
流到前灘忙似箭
不容雨點稍成紋

只愛孤峰惹寸雲
忽驚頭上雨傾盆
北來南去緣何事

路上君看屐子痕

晚雲解事忽離披
放出千峰特地奇
欲揀一峰誰子是
總如筆未退尖時

懊惱春光欲斷腸
來時長緩去時忙
落紅滿路無人惜
踏作花泥透腳香

六月十九度大庾嶺題雲封寺

梅山未到未教休
到得梅山始欲愁
知道望鄉看不見
也須一步一回頭

題南雄驛外計堂

攜家度嶺夜乘槎小泊淩江水北涯二月山城無菜把
一年春事又楊花舉頭海國星辰近回顧梅山草樹遮
客子相逢聞好語看山只尺到南華

二月二十三日南雄解舟

昨夜新雷九地鳴今朝春漲一篙清順流更借江風便
此去韶州只兩程

水沒蒲芽尚有梢風吹屋角半無茅急灘未到先聞浪

枯樹遙看只見巢

舟過黃田謁龍母護應廟

遠山相別忽相尋
水到黃田漸欲深
見說前頭山更好
且留好句未須吟

舟過謝潭

夾江百里沒人家
最苦江流曲更斜
嶺草已青今歲葉
岸蘆猶白去年花

碧酒時傾一兩杯
船門纔閉又還開
好山萬皺無人見

都被斜陽拈出來

三月一日過摩舍那灘阻雨泊清溪鎮

一聲霹靂霽光收
急泊荒茆野渡頭
摩舍那灘衝石過
曼陀羅影漾江流
山纔入眼雲遮斷
船去追程雨見留
夜宿清溪望清遠
舉頭不見隔英州

過盡危灘百不堪
忽驚絕壁翠巉巖
倒垂不死千年樹
下拂奔流萬丈潭
隔岸數峰如筆格
倚天一色染青藍
真陽此去無多子
到日應逢三月三

小泊英州

人人藤葉嚼栢榔戶戶茅簷覆土牀只有春風不寒乞
隔溪吹度袖花香

數家草草劣無多跼水飛鳶也不過道是荒城斗來大
向來此地著東坡

過真陽峽

莫道無人徑亦窮尚餘碧篠伴青楓白雲不是從天降
坐看生從翠嶼中

仰見青天尺許青無波江水不勝平只驚白晝山竹裂
杜宇初聞第一聲

榕樹陰中一葦橫鷓鴣聲裏數峰青南人到此亦腸斷
不是南人作麼生

晨炊光口砦

泊船光口薦晨炊野飯匆匆不整齊新摘柚花薰熟水
旋撈蒿苣浥生薑儘教坡老食無肉未害山公醉似泥
過了真陽到清遠好山自足樂人飢

過沙頭

過了沙頭漸有村地平江濶氣清溫暗潮已到無人會
只有篙師識水痕

船中蔬飯

食蕨食臂莫食拳食笋食梢莫食根何曾萬錢方下箸
先生把菜亦飽去嶺南風物似江南笋如東薪蕨作籃
先生食藉幾萬卷千巖萬壑皆厨傳

清明日欲宿石門未到而風雨大作泊靈星小海

風雨來從海外天
靈星海裏泊樓船
坐吟苦句斟愁酒
也是清明過一年

峽山前夕石間行
泊得船時破膽驚
驚到今宵已無膽
聽風聽浪到天明

一生行路竟如何
樂事還稀苦事多
知是風波欺客子
不知客子犯風波

西園晚步

龍眼初如菜豆肥
荔枝已似佛螺兒
南荒北客難將息

最是殘春首夏時

得壽仁壽俊二子中塗書二首

二子別我歸魚旬無消息客有饋荔枝盈籃風露色絳
羅蹙寶髻冰彈濺粘液老夫非不饒忍饒不忍喫急呼
兩健步為我致渠側默數川陸程幾日當還役惟愁香
味壞色變那敢惜十日兩騎還千里一紙墨把書五行
下廢書雙淚滴不如未到時當喜翻不懌

子壯祇覺幼子學祇覺遲二子忽頽然語離又作悲今

年來官下二子暫我隨懸知住不久且復相從嬉鶴書
自天降槐花呼汝歸伯也恐我愁願留不忍辭仲也慘
不釋飛鳴思及時豈有鳳將雛雛長禁其飛決焉遣還
家一笑更不疑傍人怪無淚淚入肝與脾我昔如汝長
壯志在四方集賢給筆札秉燭促夜裝平明出門去振
衣不徬徨先君泣然泣感我令我傷先君顧我語汝行
勿斷腸他日汝養子此悲會身當老懷追陳迹心折涕

泗滂

宴客夜歸六言

月在荔枝梢上人行茉莉花間但覺曾吞碧海不知身
落南蠻

雨霽登連天觀

高臺十日不曾登雨後檣藤挂晚晴城外諸峰迎落照
松根細草總斜明眼穿嶺北書不到秋入海南愁頓生
只有荷花舊相識風前翠蓋為人傾

得壽仁壽俊二子書皆以病不及就試且報來期

二子何時到三秋欲盡頭收渠半張紙洗我一年愁不
得毛錐力元非子墨羞海山寒更碧整駕可同遊

送蔡定夫赴湖南提刑

菊後霜前換繡衣湘南嶺北看梅枝還將方策汗青語
拈出園扉草綠時四海幾人憐我老三年兩作送君詩
借令貴殺衡陽紙半幅無妨慰夢思

遣騎問訊范明州叅政報章寄絕句和韻謝之

南海人從東海歸新詩到日恰梅時撚梅細比新詩看

未必梅花瘦似詩

至日薄寒

舊傳冬不到南中今歲南中稍稍冬
曦幕暖吹紅皺起霜橋冷步縞聲鬆
裁縫苦思詩千首排遣清愁酒一鍾
不是梅花開獨早似憐北客老相逢

病中夜坐

月留銀漢小徘徊似戀空庭獨樹梅
玉漏聽來更二點燭花剪了暈重開
病身不飲看人醉乾雪無端上鬢來

後日老衰知健否只今六九已摧隤

辛丑正月二十五日遊蒲澗晚歸

桃李深酣日池塘淺試春霽暉搖遠水新煖軟遊人生
酒清無色青梅脆有仁烟鍾能底急催我入城闔

食車螯

珠宮新沐淨瓊沙石鼎初燃淪井花紫殼旋開微滴酒
玉膚莫熟要鳴牙棖拖金線成雙美薑臂糟丘總一家
老子宿醒無解處半杯羹後半甌茶

謝福建茶使吳德華送東坡新集

黃金白玉明月珠清歌妙舞傾城姝他家都有儂家無
却有四壁環相如此外更有一牀書不甚自飽飽蠹魚
故人遠送東坡集舊書避席皆讓渠兒時作劇百不懶
說著讀書偏起晚乃翁作惡嗔兒痴強遣飢腸饒蠹簡
老來萬事落人後浪取故書遮病眼眼病逢書輒著花
筆下蠅頭成老鴉病眼將奈故書何故書一開一長嗟
東坡文集儂亦有未及終篇已停手印墨模糊紙不佳

亦非魚網非科斗富沙棗木新雕文傳刻疎瘦不失真
紙如雪繭出玉盆字如霜雁點秋雲老來兩眼如隔霧
逢柳逢花曾不覩只逢書冊佳且新把翫崇朝那肯去
東坡痴絕過於儂不將一褐易三公只將筆頭挂月脇
萬古凡馬不足空故人憐我老愈拙不寄金丹扶病骨
却寄此書來惱人挑落青燈搔白髮

連天觀望春憶毗陵翟園

中和節侯社前時春到園林最晚枝弄水不冰攜扇手

登臺猶粟向風肌
烏烏聲裏山光濕
花柳陰中日脚遲
北望翟園春正鬧
海棠錦繞雪荼蘼

二月十三日謁西廟早起

起來洗面更焚香
粥罷東窓未肯光
古語舊傳春夜短
漏聲新覺五更長
近來事事都無味
老去波波有底忙
還憶山居桃李晚
餘曠為枕睡為鄉

寄題蕭國賢佚我堂

軟紅塵裏幾時休
重碧杯中且拍浮
坐看痴兒誇捷足

可憐到老不回頭幅巾藜杖聊三徑明月清風自一丘
我亦年來厭奔走夢騎野鶴訪沙鷗

題桃柳樹

化工到得巧窮時東補西移也大奇君看桃柳一窠子
竹身杏葉海棠枝

春晴懷故園海棠

故園今日海棠開夢入江西錦繡堆萬物皆春人獨老
一年過社燕方回似青如白天濃淡欲墮還飛絮往來

無奈春光餐不得遣詩招入翠瓊杯

竹邊臺榭水邊亭不要人隨只獨行乍暖柳條無氣力
淡晴花影不分明一番過雨來幽徑無數新禽有喜聲
只欠翠紗紅映肉兩年寒食負先生

予去年正月離家之官益兩年不見

海棠
矣

初食笋蕨

魚鳳烹龍世浪傳猩脣熊掌我無緣只逢笋蕨杯盤日
便是山林富貴天穉子玉膚新脫錦小兒紫臂未開拳

只嫌嶺外無珍饌一味春蔬不直錢

寒食對酒

荔枝園園花寒食日日雨先生老多病頗已疎綠醕兒
童喜時節笑語治樽俎南烹既前陳北果亦草具蝸蟬
方纔甘笋蕨未作苦先生欲獨醒兒女難多拒初心且
一盃三盃亦漫許醒時本強飲醉後忽快舉一盃至三
盃一二三四五偶然問兒輩卒爵是何處兒言翁但醉
已忘酒巡數

明發青塘蘆包

青塘無店亦無人，只有青蛙紫蚓聲。
蘆荻葉深蒲葉淺，荔枝花暗楝花明。
船行兩岸山都動，水入諸村海旋成。
回望越臺烟雨外，萬峰盡處五羊城。

過胥口江水大漲舟楫不進

北江西水兩相逢，胥口波濤特地雄。
萬事向儂冰與炭，一生行役雨和風。
急流欲上人聲鬧，近岸還移牽去聲路。
窮河伯喜歡儂苦惱，併將恩怨惱天公。

入峽歌

峽山未到日日愁峽山已到愁却休不是朝來愁便散
愁殺人來天不管昨宵遠望最高尖今朝近看雲隔簾
樓船衝雨過山下兩扇屏風生色畫江神不遣客心驚
雲去雲來遮巖扃忽然塞雲露山脚仰見千丈翠玉削
篙師相賀漲痕落今日可到鷓鴣泊

峽山寺竹枝詞

峽裏撐船更不行權郎相語改行程却從西岸拋東岸

依舊船頭不可撐

一水雙崖千萬紫有天無地只心驚無人打殺杜鵑子
雨外飛來頭上聲

龜魚到此總回頭不但龜魚蟹亦愁底事詩人輕老命
犯灘衝石去韶州

一灘過了一灘奔一石橫來一石蹲若怨古來天設險
峽山不過也由君

天齊浪自說浯溪峽與天齊真箇齊未必峽山高爾許

看來只恐是天低

夜泊英州

旅病情先惡愁眠夢更驚犬須終夜吠月到五更明未
解波頭意偏來枕底聲平時厭行路投老正追程

阻風泊鍾家村離英州已三日纔行二十里

南遊端為看山來過眼匆匆首屢回不是阻風船不進
何緣看盡萬崔嵬

滿船兒女厭江行我愛江行怕入城慚愧風師教款曲

為分一舍作三程

明發陳公徑過摩舍那灘石峰下

遙松烟未消近竹露猶滴石峰矜孤銳喜以江自隔清
潭涵曦紫碧岫過雲白回瞻宿處隄路轉不可覓地迥
人絕影山僻虎留跡下有無底潭上有欲落石是間一
徑橫夾以萬松直樹從何時有陳公所手植陳公今焉
在徑松自寒碧

昨宵望石峰相去無一尺今日行終朝祇繞石峰側石

峰何曾遠江路自不直仰瞻碧孱巖清峽如立壁反覆
得細看何必更登陟後顧江已遠前睨山若塞棹進岸
自回天水未有極簾欣入絕巘舟愕觸潛石東瞰淡未
熹北吹寒更寂岸草不知愁向人弄晴碧

澄潭湧晴暈不風自成花回流如倦客出門復還家江
晴已數日新漲沒舊沙知是前溪雨濕雲尚橫斜山轉
江亦轉江行山亦行風鬟照玉鏡素練縈青屏我本山
水客澹無軒冕情塵中悔一來事外懷孤征忽乘滄浪

舟仰高俯深清餐翠腹可飽飲淥身須輕鷓鴣不相識
還作故園聲

危峰瑩無土平地及孤石如何半巖間亦有小樹碧走空
根苦辛倚險榦寒瘠芳蘭間叢生紫蕤濯幽色近香許
世聞遠秀絕人摘而我雲外身方茲喟行役

城中安得山無山安得詩我入五羊城遠與山水辭有
鏡不敢覽塵面我自知解組來歸亭山水奔相隨水光
動我巾山色染我衣舟行將一月恨速不恨遲山雲來

未已江月皎無滓平聲開懷放之入出語頗似之

我從靈洲來惟見芳草渡蒹葭隨水遠曠野無立樹挂
席上真陽好山忽無數好山如隱士避世不自露不應
官道傍乃有見山處借識衛叔玠未覩樂彥輔石峰再
難得舟過更回顧

南中山絕佳所恨人烟稀略無好事人結茅臨深溪峰
頂可月亭岸石即釣磯空令煙中猿挂崖美連漪山多
人自少人遠山益奇我舟行不留過眼山如馳過眼意

已足久留亦何為

明發白沙灘聞布穀有感

提壺勸我飲杜鵑勸我歸不如布穀子勸我勤耘耔我
少貧且賤不但無置錐筆耒墾紙田黑水導墨池借令
字堪煮識字亦幾希啼饑如不聞饑憤自不啼駿奔三
十年辛勤竟何為髮從道塗白面為風霜薰夜來白沙
灘老命輕如絲洪濤舞一葉呼天叫神祇生全乃偶然
人力初何施曉聞布穀聲如在故山時坐令萬感集初

悟半世非一險靡不悔數悔庸何追有田不歸耕布穀
真吾師

荔枝堂書懋

荔子陰中風絕涼菖蒲節後日偏長落殘數柄荷花蕊
漫得一瓶泉水香多病早衰非破硯欲行復倦且胡牀
曲江近北差遲著不道江山勝五羊

風雨

殘風刺雨故欺人垂箔關窓護病身自拾荷花揩面汗

新將筍簪製頭巾
梅天筆墨都生醖
棐几文書懶拂塵
帽子一峰青可掇
隔牆不敢畧開門

送彭元忠縣丞北歸

君從循州來却回
饒州去拍天海浪
拂日峰瓊尺裁成
錦機句學詩初學
陳後山霜皮脫盡
山骨寒近來別具
一隻眼要踏唐人
最上關三春弱柳
三秋月半溪清水
半峰雪只今六月
無此物君能喚渠
來入筆恰恰新鶯
百轉聲忽有寒蛩
終夜鳴瀟湘故人
汝漢客為君一夜

頭盡白我欠天公詩債多霜髭撚盡未償他君懷玉盤
金叵羅合騎天駟超天河如何也鑄一大錯自古詩人
多命薄黃茅起烟如黃沙瘴毋照水曼陀花廣東之遊
樂復樂勸君不如早還家

題望韶亭

新隆寺後看韶石三三兩兩各依稀金坑津頭看韶石
十十五五不整齊一來望韶亭上看九韶八音堆一案
金鐘大鏞浮水涯玉瑟瑤琴倚天半堯時文物也麓疎

禮樂猶帶鴻荒餘茅茨殿上槌土鼓葦籥聲外無笙竽
黃能卽君走川嶽領取后夔搜禮樂嶧山桐樹半夜鳴
泗水石頭清晝躍山祗川后爭獻珍姚家制作初一新
帝思南嶽來時巡宮琛廟寶昏駿奔曲江清徹碧瓊軟
海山孤尖翠屏展天顏有喜后夔知一奏雲韶供亞飯
帝登九嶷忘却歸不知斑盡湘笛枝后夔一脛跛莫隨
坐委衆樂江之湄儀鳳舞獸掃無迹獨留一狻守其側
至今喚作獅子石雨淋日炙爛不得洞庭張樂已莓苔

健為獲磬亦塵埃不如九韶故無恙憂擊尚可冬起雷
何時九秋霜月裏來聽湘妃瑟聲美曲終道是不見人
江上數峰是誰子

南雄驛前雙柳

外計堂前柳絕奇南中無此兩渦絲午風不動休嫌暑
要看枝枝自在垂

謝木韞之舍人分送講筵賜茶

吳綾縫囊染菊水蠻砂塗印題進字淳熙錫貢新水芽

天珍誤落黃茅地故人鸞渚紫薇郎金華講徹花草香
宣賜龍焙第一綱殿上走趨明月璫御前啜罷三危露
滿袖香煙懷璧去歸來拈出兩蜿蜒雷鳴晦冥驚破柱
北苑龍芽內樣新銅圍銀範鑄瓊塵九天寶月霏五雲
玉龍雙舞黃金鱗老夫平生愛煮茗十年燒穿折脚鼎下
山汲井得甘泉上山摘芽得苦梗何曾夢到龍遊窠何
曾夢吃龍芽茶故人分送玉川子春風來自玉皇家鍛
圭椎壁調冰水烹龍魚鳳搜肝髓石花紫笋可衙官赤

印白泥牛走爾故人氣味茶樣清故人丰骨茶樣明開
絨不但似見面叩之咳唾金石聲麴生勸人墮巾幘睡
魔勸我拋書冊老夫七椀病未能一啜猶堪坐秋夕

荔枝堂夕眺

病骨秋臞怯暮清涼風偷帶北風輕迎寒窓隔重糊遍
只放書邊數眼明

九日郡中送白菊

未應白菊減於黃金作鈿心玉作裳一夜西風開瘦蕾

兩年南海伴重陽若言佳節如常日為底寒花分外香
揜蕊浮杯莫多著一枝留插髮邊霜

至節宿翁源縣與葉景伯小酌

此縣誰言是強名古來十室亦琴鳴只嫌六七茅竹舍
也有二三雞犬聲村酒分冬勝虛度霜風一夜辦新晴
半生客路逢佳節佳節何曾負半生

過烏沙望大唐石峰

城中長恨不見山出城見山如等閒曹溪過了過岑嶺

不惟山粗石仍獷山如可師癩滿頂石如陳三癭聯頸
一路令人眼不開開眼令人悶不醒烏沙未到一溪橫
水清見底心已清大唐六峰爭出迎水精筆架琉璃屏
兩峰玉笋纔出土三峰水盤飮角黍一峰新琢金博山
霧作沈烟雲作縷忽然前岡平截斷萬丈青尖餘寸許
山神解憐客子愁平地跳出蒼琳瑯更借天公修月斧
神工一夜忙凋鏤近看定何者遠看真可畫山神自賀
應自詫古來此地無車馬

蕈子

空山一雨山溜急漂流桂子松花汁土膏鬆暖都滲入
蒸出蕈花團戢戢戴穿落葉忽起立撥開落葉百數十
蠟面黃紫光欲濕酥莖嬌脆手輕拾色如鶯掌味如蜜
滑如蓴絲無點澁傘不如笠釘勝笠香留齒牙麝莫及
菰羔楮雞避席揖餐玉茹芝當却粒作羹不可疏一日
作腊仍堪貯盈笈

過陂子逕五十餘里喬木蔽天遣悶七絕

林中亭午始微明
楓倒杉傾滿路橫
黃葉青苔深一丈
先生却愛此中行

草光葉潤亦清佳
翠裏生香不是花
一事說來人不信
蕨長如樹蚓如蛇

蘆深石路旋芟開
藤挂肩輿却倒回
蘭蕙連山為誰好
芭蕉滿谷不緣栽

為憐上轎齧人肩
下轎行來腳底穿
客子心心愁欲暮
碧雲偏作半陰天

晚風寂寂樹陰陰松不悲鳴竹不吟只有清泉逢白石
向人刺口說山林

澗泉勸我出山逢曲曲遮留步步隨泉自多情儂自悶
今宵會有出山時

山窮喜見一平川不似林中不識天只此出山穴便散
何須更問小行年

過長峰逕遇雨遣悶

南人謂深山長谷寂無人煙中通一路者謂之逕自

翁源至河源其逕有三猿藤陂子各五十里惟長峰
百里過者往往露宿鑽火以炊予以半夜一晝疾行
出逕宿秀溪云

野炊未到也饑嗔到得炊邊却可人傘作旅亭泥處坐
水漂地竈雨中新

河清人跡到來曾點污松風澗水聲不是先生愛山水
是間却遣阿誰行

猿藤陂子枉驚吁未抵長峰小半途今夕前頭何計宿

不知出得還來無

下到危陂斗處泥旁臨崩岸仄邊溪不須杜句能驅瘧
只誦長峰遣悶詩

出得山來未見村已知村近稍多田坐看雲脚都垂地
回望峰頭已入天

明發曲坑

雲橫平野近人低似絮如紗只隔溪行到溪東元不見
回頭却復在溪西

明發龍川

山有濃嵐水有氛
非烟非霧亦非雲
北人不識南中瘴
只到龍川指似君

發通衢驛見梅有感

忙中撩眼雪枝斜
落片紛紛點玉沙
虛過一冬妨底事
不曾款曲是梅花

過五里逕

野水奔來不小停
知渠何事太忙生
也無一個人催促

自愛爭先落澗聲

晨炊浦村

水出何村尾橋橫亂篠叢隔溪三四屋對面一雙峰過
午非常暖疑他不是冬疎梅照清淺作意為誰容

入程鄉縣界

長樂昏嵐著地凝程鄉毒霧喫人腥吾詩不是南征集
只合標題作瘴經

明發房溪

山路婷婷小樹梅為誰零落為誰開多情也恨無人賞
故遣低枝拂面來

青天白日十分晴轎上蕭蕭忽雨聲却是松梢霜水落
雨聲那得此聲清

過單竹洋逕

兩山何許來此焉忽相尋摩肩不少讓爭道各載駸喬
木與修竹相招為茂林無風生翠寒未夕起素陰天垂
木末近日到谷底深空山時一響已動客子心行至幽

絕處更聞啼怪禽

自彭田鋪至湯田道旁梅花十餘里

一行誰栽十里梅下臨溪水恰齊開此行便是無官事
只為梅花也合來

過瘦牛嶺

行盡天涯未遣休梅州到了又潮州平生豈願乘肥馬
臨老須教過瘦牛夢裏長驚炊劍首春前應許賦刀頭
夜來尚有餘樽在急喚渠儂破客愁

題瘦牛嶺

牛頭定何向牛尾定何指我不炙汝心我不穿汝鼻如
何不許見金牛霧隱雲藏若相避行行上牛背上下三
十里一雨生新泥寸步不自致胡不去作牽牛星渴飲
銀河天上水胡不去作帝籍牛天田春風牽犁耜却來
蠻村天盡頭塞路長遣行人愁夕陽芳草只依舊瘦牛
何苦年年瘦

道旁草木

古樹何年澗底生只今已與嶺般平
千梢萬葉無重數
一一分明報雨聲

過金沙洋望小海

海霧初開明海日近樹遠山青
歷歷忽然咫尺黑如漆
白晝如何成暝色不知一風何許來
霧開還合合還開
晦明百變一彈指特地遣人驚
復喜海神無處逞神通
放出一頭誇客子須臾滿眼賈胡船
萬頃一碧波黏天
恰似錢塘江上望只無兩點海門山
我行但作遊山看

減却客愁九分半

題韓亭韓木

笑為先生一問天
身前身後兩般看
亭前樹子關何事
也得天公賜姓韓

潮陽海岸望海

動地驚風起海飈
為人吹散兩眉愁
身行島北新春後
眼到天南最盡頭
衆水更來何處著
千峰赴此却回休
客間供給能消底
萬頃煙波一白鷗

除夜宿石塔寺

醉後先眠客莫嗔誰能守歲費精神幸無爆竹驚寒夢
休羨椒花頌好春今歲明年纔隔夕人情物態頓趨新
遙憐兒女團圞處止欠屠酥第十人

壬寅歲朝發石塔寺

曉鐘夢裏苦相呼強理烏紗照白鬚只有銅爐燒柏子
更無玉盞瀉屠蘇佛桑解吐四時豔鐵樹還如九節蒲
省得一朝疲造請却教終日走長途

寺法堂前有紅佛
桑四時有花又有

小木名鐵樹葉似弱
而紫幹如密節菖蒲

海岸沙行

海濱半程沙上路海風吹起成煙霧行人合眼不敢覷
一行一步愁一步步沙痕沒芒屨不是不行行不去
若為行到無沙處寧逢石頭齧足拇寧踏黃泥濺袍袴
海濱沙路莫再度

食蛤蜊米脯羹

傾來百顆恰盈奩剝作杯羹未屬厭莫遣下鹽傷正味

不曾著蜜若為甜雪搯玉質全身瑩金緣冰鈿半縷纖
更浙香杭輕糝却發揮風韻十分添

正月三日宿范氏莊

山歷愁寡天沙征恨多地兩日行海濱雖近彌不至遐
瞻道旁堠我進渠祇退大風來無隔午燠皎安避今夕
范氏莊初覲三峰翠愈遠故絕瑕不多始足貴巉然半
几出蹙若一拳細輕霏淡晚秀隤照熒春媚玩久有餘
佳繪苦未必似今夕勿掩扉月中對山睡

人日宿味田驛

破驛荒涼晚解鞍，急呼重碧敵輕寒。
南中氣候從頭錯，人日青梅已醖酸。

正月十二日遊東坡白鶴峰故居，其北思無邪齋
真蹟猶存。

詩人自古例遷謫，蘇李夜郎并惠州。
人言造物因朝弄，故遣各捉一處囚。
不知天公愛佳句，曲與詩人爲地頭。
詩人眼底高四海，萬象不足供詩愁。
帝將湖海賜湯沐，

僅僅可以當冥搜却令玉堂揮翰手為提椽筆判羅浮
羅浮山色濃潑黛豐湖水光先得秋東坡日與羣仙遊
朝發崑閬夕不周雲冠霞佩照宇宙金章玉句鳴天球
但登詩壇將騷雅底用蟻穴封王侯元符諸賢下石者
祇於千載掩鼻羞我來剝啄王粲宅鶴峰無恙江空流
安知先生百歲後不來弄月白蘋洲無人挽住乞一句
猶道雪乳冰湍不當年醉裏題壁處六丁已遣雷電收
獨遺無邪四箇字鸞飄鳳泊蟠銀鈎如今亦無合江樓

嘉祐破寺風颼颼

放船

岸岸人家住門門水面開
老翁扶杖立稚子看船來
一夜鳴春雨諸灘漲綠醅
順流行自快更著北風催

南海東廟浴日亭

南海端為四海魁扶桑絕境信奇哉
日從若木梢頭轉潮到占城國裏回
最愛五更紅浪沸忽吹萬里紫霞開
天公管領詩人眼銀漢星槎借一來

題南海東廟

羅浮山如萬石鍾一股南走如渴龍雷奔電激遮不住
直抵海濱無去處低頭飲海吐絳霞舉頭對着祝融家
珠宮玉室水晶殿萬水一日朝再倚青山四圍作城郭
海濤半浸青山脚客來莫上浴日亭亭上見海君始驚
青山缺處如玉玦潮頭飛來打雙闕晴天無雲濺碎雪
天下都無此奇絕大海更在小海東西廟不如東廟雄
南來若不到東廟西京未覩建章宮海神喜我著綺語

為我改容收霧雨乾坤軒豁未能許小試日光穿漏句

船過靈州

却緣野濶覺天低政值潮平苦漿遲洲背兩船歸別港
岸頭數屋出疎籬江山慘淡真如畫煙雨空濛自一奇
病酒春眠不知曉開門拾得一篇詩

清遠峽

清遠望峽山山脚無半里小舟行其間五日翠未已並
馳兩蒼龍中夾一玉水送我到英州渠當自回轡

誰開峽山寺政要避世喧深潭無來路斷崖有清天療
飢摘山果擊磬煩嶺猿人跡今擾擾祇緣一魚船

光口夜雨

峽江清空來雨急寒聲夜半蕭蕭發玻瓈盆面跳萬珠
一顆一聲清入骨夢中搔首起來聽聽來聽去到天明
一生聽雨今頭白不識春江夜雨聲

出真陽峽

春光濃裏更江行畫舫分明是水亭出了真陽恰惆悵

數峰如笋雨中青

出峽即見碧落洞數石峰

未必陽山天下窮英州窮到骨中空郡官見怨無供給
支與真陽數石峰

碧落洞前灘水

石峰背後即英州只不教人到岸頭羅帶春風吹不直
故將數摺惱行舟

碧落峰前上一灘篙師叫得口多乾開門將謂船行遠
只在峰頭蘆荻灣

碧落洞

夢中曾泊洞前船
落絮飛花是去年
今日來尋泊船處
一江風雨草連天

神堂舖前桃花

北江二月正春寒
初見桃花喜未殘
臘月潮州見桃李
元來不作好春看

題太和主簿趙昌父思隱堂

西昌主簿如禪僧
日餐秋菊嚼春冰
西昌府舍如佛屋

一物也無唯有竹俸錢三月不曾支竹陰過午未晨炊
大兒叫怒小兒啼乃翁對竹方哦詩詩人與竹一樣瘦
詩句與竹一樣秀故山蒼玉垂綠雲月梢風葉最關身
勸渠未要思舊隱且與西窗作好春

南華道中

清曉新晴物物熙小風淡日暖歸旗不堪回首南華路
去歲梅華細雨時

騎吏歡呼不要嗔三千里外北歸人慙慙自掬曹溪水

淨洗先生面上塵

曉霧

不知香霧濕人鬚
日照鬚端細有珠
政是春山眉樣翠
被渠淡粉作糊塗

送胡端明赴召

紫泥夜下日星暉
赤鳥朝看袞綉歸
中國如今相司馬
四夷見說問緋衣
金魚玉帶明霜鬢
斗極台符拱太微
衛武年齡子儀考
一身雙美古來稀

曉出郡城往值夏謁胡端明泛舟夜歸

郡城至值夏兩日非寬程奔走豈吾願
詔書促南征出郭星未已歸棹月已生
問人水深淺舟子喧未應水石代之對
淙然落灘聲危峰起夕蒼暗潭生夜清
江轉風颯至病肩難隱稜添衣初嬾尋
忍寒良不能近城一二里遠岸三四燈
望闕恐早閉驅舟祇遲行多情半環月
久矣將西傾欲落且小留知我要入城
月細光未多火星助之明至舍心未穩
麗譙纔一更

二月一日曉渡太和江

綠楊接葉杏交花
嫩水新生尚露沙
過了春江偶回首
隔江一岸好人家

曉翠妨人看遠山
小風偏入客衣單
桃花愛做春寒信
只恐桃花也自寒

二月初頭春向中
花梢薄日柳梢風
折花客子渾無賴
狼籍須教滿路紅

晨炊黃宙鋪飯後山行

山行行得軟如綿，急上籃輿睡霎間。
夢裏只聞人喝道，不知過盡數重山。

萬安出郭早行

玉花小朵是山礬，香殺行人只欲顛。
風掠水衣無處去，柳塘著在角頭邊。

晨炊阜徑

問路無多子，驅車半日間。
行穿崖石古，踏破蘚花斑。
綠語鶯邊柳，青眠水底山。
人家豈無地，爭住小溪灣。

明發韶州過赤水渴尾灘

石山七峰皆尖秀而一峰最高

船下驚灘浪正喧
花汀水退走沙痕
一峰忽自雲端出
只見孤尖不見根

出峽

朝來入峽悶船遲
也有欣然出峽時
山色亦如人送客
送行倦了自應歸

船行儘緩底須忙
詩卷聊堪度日長
瓶裏柚花偷觸鼻
忽然將謂是燒香

過沙頭

非煙非雨淡淡濛濛深閉窗扉護晚風
舩外山光簾裏翠
岸頭花影鏡中紅

三月晦日遊越王臺

榕樹梢頭訪古臺下看碧海一瓊杯
越王歌舞春風處
今日春風獨自來

越王臺上落花春一掬山光兩袖塵
隨分杯盤隨處醉
自憐不及踏青人

四月八日嘗新荔枝

一點臙脂染蒂旁忽然紅遍綠衣裳紫瓊骨骼丁香瘦
白雪肌膚午暑涼掌上冰丸那忍觸樽前風味獨難忘
老饕要啖三百顆却怕甘泉凍斷腸

夏日書事

一字看成兩霜鬚摘轉多既無書冊分奈此日長何荔
子紅初皺春醅碧欲波醉來愁自去不去亦從他

遊蒲澗呈周帥蔡漕張舶

勝日從公蒲澗遊，萬壑聲滿千崖秋。一逕如蛇三百曲，
繞盡山腹到山頭。穹巖千仞敲欲裂，仰看飛泉瀉雲窟。
鏘成環珮奏成琴，濺作珠璣霏作雪。步穿危磴攀蒼藤，
忽上穹巖頂上行。人在半天泉在井，不敢下瞰惟聞聲。
只怪前驅深不見，須臾却向前山轉。海風吹袖萬丈長，
海水去人一弓遠。老僧高卧晏未興，先遣長松夾道迎。
小參古殿黃面老，不見舊日安期生。景泰上方半堵壁，
城中望之雪山白。却從景泰望城中，曉日樓臺煥金碧。

君不見中流千金博一壺不如遊山飢時粥一盂金印
繫肘大如斗不如遊山倦時一杯酒安期飛昇今幾年
祖龍不是不求仙至今年年七月二十五傾城遊人來
訪古

三月一日雨寒

南方氣候北方殊春裏清寒臘裏無雨入竹林渾不見
只來葉尾作真珠

補盡空櫺閉盡門茶甌火閣對爐熏中庭淺水休教掃

正要留看雨點紋

梳頭正美睡相催理盡霜絲夢恰回窗隙小風能幾許
也吹蛛網去還來

姚黃魏紫向誰賒郁李櫻桃也淺些却是南中春色別
滿城都是木綿花

只見春晴道是晴不知半夜嫩寒生疾風吹落林間雨
細雨還成大雨聲

新晴西園散步

久雨令人不出門
新晴喚我到西園
要知春事深和淺
試看青梅大幾分

池水初生葢玉沙
雨餘碧草卧堤斜
日搖波影纏橋柱
綉出欒枝遍地花

紅雨斑斑竹外蹊
黃金嫋嫋水邊絲
舉頭揀遍低陰處
帶葉青梅摘一枝

厭見山居要出來
出來厭了却思回
人生畢竟如何是
且看桃花晚荅開

上巳前一日欲雨復晴

去年上巳正南來
明日初三忽又催
雨壓雲頭渾欲落
風翻日脚急吹開
莫因嶺外無花卉
便對春光廢酒杯
只揀茂林脩竹處
蘭亭禊事足追回

岸沙

水嫌岸窄要衝開
細蕩沙痕似剪裁
蕩去蕩來元不覺
忽然一片岸沙摧

遣悶

江樹深春色村雞薄晚聲雨添青笠重人減畫船輕遣
悶惟須睡哦詩只強成獨判連日雨却惜半朝晴

回望黃巢磯之險心悸久之

夜雲到曉不教收初日微明又却休雨為岸花新洗面
水撩江草只搖頭千篙百棹力都竭十里九磯船正愁
若到峽中應更險却思峽外是安流

峽中得風掛帆

樓船上水不寸步兩山慘慘愁將暮一聲霹靂天欲雨

隔江草樹忽起舞風從海南天外來怒吹峽山山倒開
百夫絕叫椎大鼓一夫飛上千尺桅布帆掛了却袖手
坐看水上鵝毛走

夜泊鷓鴣磯

峽中盡日沒人煙船泊鷓鴣磯也有村已被子規酸骨死
今宵第一莫啼猿

真陽峽

清遠雖佳未足觀真陽佳絕冠南蠻一泉嶺背懸崖出

亂灑江邊怪石間夾岸對排雙玉筍此峰外面萬青山
險艱去處多奇觀自古何人愛險艱

阻風鍾家村觀岸傍物化

殼如蟬蛻濕仍新那復浮嬉浪底春却把今身飛照水
不知石上是前身

題鍾家村石崖

水與高崖有底冤相逢不得鎮相喧若教漁父頭無笠
只着蓑衣便是猿

檄風伯

峭壁呀呀虎擘口惡灘洶洶雷出吼
汴流更着打頭風
如撐鐵船上牛斗風伯勸爾一杯酒
何須惡劇驚詩叟
端能為我霽威否岸柳掉頭荻搖手

嶺雲

好山幸自綠嶄嶄須把輕雲護淺嵐
天女似憐山骨瘦
為縫霧縠作春衫

憩楹塘驛

夾路黃茅與樹齊
人行茅裏似山雞
長松不與遮西日
却送清陰過隔溪

過建封寺下連魚灘

江收衆水赴單槽
石壁當流鬪雪濤
將取危舟飛過去
黃頭郎只兩三篙

夢裏篙師忽叫灘
老夫驚殺起來看
前船過盡知無慮
未後孤舟膽自寒

羅仲憲送焯菜謝以長句

學琴自有譜相鶴自有經
疏經我繙盡不見蕓菜名
金華詩裏初相識玉友尊
前每相憶坐令芥孫薑子
芽一見風流俱避席取士
取名多失真向來許靖亦
誤人君不見鄭花不得半
山句却參魯直稱門生

曲江重陽

煙描水寫老秋容
嶺外秋容也自濃
如見大賓新露菊
若歌商頌晚風松
插花醉照瀟溪井
吹髮慵登帽子峰
莫問明年衰與健
茱萸何處不相逢

曉炊黃竹莊

染練江山宿雨餘
枝枝葉葉潤如酥
絲窠瓔珞消多少
破盡天公百斛珠

琯灰簌簌欲飛聲
日到牽牛第幾星
地底陽生人不覺
燒痕未冷已青青

城中殊未有梅看
莫是冬暄欠淺寒
行到深山最寒處
兩株香雪照冰灘

曉晴過猿藤逕

厭雨欣初霽貪程敢晏眠排天雙壁起受日一峰先入
逕惟逢樹無人況有煙藤深猿不見聲到客愁邊

野炊猿藤逕樹下

逕仄旁無地林間忽有天丹楓明遠樹黃葉暗鳴泉苔
錦銀槍竈蘆葦玉帳氈從軍古云樂乞與箇山川

明發瀧頭

黑甜偏至五更濃強起侵星敢小慵輸與山雲能樣嬾
日高猶宿夜來峰

題興寧縣東文嶺瀑泉在夜明場驛之東

筓輿路轉崖欹傾只聞滿山泉水鳴
卷書急關已半失眼不停注耳細聽
石如鐵色黑壁立鏡面平水從鏡面
一飛下斲笛織簞風漪生石知水力倦
半壁鍾作玉一泓水行到此欲小憇
後水忽至前水驚分清裂白兩派出
跳珠躍雪雙龍爭不知落處深幾許
但聞井底碎玉聲安得好事者泉上
作小亭釀泉為酒不用麴春風吹
作蒲萄綠醉寫泉聲入枯木何處更
尋響泉曲

夜宿房溪飲野人張珣家桂葉鹿蹄酒其法以桂
葉為餅以鹿蹄煮酒釀以八月過是期味減云
桂葉揉青作麴投鹿蹄煮醪趁涼簞落杯瑩滑冰中水
過口森嚴菊底秋玉友黃封猶退舍薤湯蜜汁更輸籌
野人未許傳醅法剩買雙餅過別州

揭陽道中

地平如掌樹成行野有郵亭浦有梁舊日潮州底處所
如今風物冠南方

宿南嶺驛

蕨手猶拳已箸長菊苗初甲可羹嘗
山村富貴無人享
一路春風野菜香

感興

行役忘衰暮逢春感物華
一來梅嶺外三見木綿花
山鹿寧遊市江鷗本卧沙
紅塵無了日白髮未還家

夜泊曲灣

順流一日快舟行
薄暮風濤特地生
不是江神驚客子


勸人早泊莫追程

荔枝歌

粵犬吠雪非差事
粵人語冰夏蟲似
北人冰雪作生涯
冰雪一窖活一家
帝城六月日卓午
市人如炊汗如雨
賣冰一聲隔水來
行人未喫心眼開
甘霜甜雪如壓蔗
年年窖子南山下
去年藏冰減工夫
山鬼失守嬉西湖
北風一夜動地惡
盡吹北冰作南雹
飛來嶺外荔枝梢
絳衣朱裳紅錦包
三危露珠凍寒泚
火傘燒林下成水

北人藏冰天奪之却與南人銷暑氣

宋詩鈔卷七十四



總校官庶吉士臣張能照
校對官檢討臣王鍾健
謄錄監生臣趙之璧

欽定四庫全書薈要

集部

宋詩鈔卷七十五

六

詳校官候選知縣臣吳甸華



欽定四庫全書薈要卷二萬三百二十八

集部

宋詩鈔卷七十五

內閣中書舍人吳之振編

楊萬里朝天集鈔

仲冬詔追造朝供尚書郎職舟行阻風清泥

江神風伯戰方酣北浪吹翻總向南未放人扶下江柁
却教眼看上江帆

暮泊鼠山聞明朝有石塘之險

下水船逢上水船夕陽仍更蒞沙灘
雁來野鴨却驚起我與舟人俱仰看
回望雪邊山已遠如何蓬底暮猶寒
今朝莫說明朝路萬石堆心一急湍

二月望日過宿南宮和尤延之左司郎署疎竹之

韻

此君見我眼猶青笑我銀髭雪點成
憶昔與君同舍日感渠將雨作秋聲
夜來過宿三更悄葉底春寒一倍生
夢入故園數新筍籬邊破蘚幾莖橫

七字謝紹興帥丘宗卿惠楊梅

越絕諸楊盛一時與儂瓜葛不曾知老夫自笑吾衰矣
此客何從夢見之也解過江尋德祖政緣作尹是丘遲
渠伊不是南村派未分先驅事荔枝

謝胡子遠郎中惠蒲大韶墨報以龍涎心字香

墨家者流老蒲仙碧梧採花和麝烟華陽黑水煎膠漆
太陰玄霜作肌骨龍尾磨肌飲鼠鬚落點髹几几不如
夷甫清瞳光敵日一見墨卿驚自失後來夔州有梁杲

爾來黥川有吳老亦追時好得時名竟為蒲生豎降旌
吳墨往往玄尚白梁墨濕濕稿黏壁南宮先生來自西
惠然贈我四玄圭我無鵲返鸞回字我無金章玉句子
得君此贈端何似兀者得韓僧得髭安得玉案雙鳴璫
金刀繡段底物償送以龍涎心字香為君興雲繞明窓
李聖俞郎中求吾家江西黃雀醪法戲作醪經遺
之

江夏無雙小道士一丘一壑長避世裁雲縫霧作羽衣

蘆花柳綿當裘袂身騎鴻鵠太液池脚踏金墓攀桂枝
渴飲南陽菊潭水飢啄藍田粟玉芝今年禾田秋大熟
紫皇遣刈神倉穀一雙鳬雁墮雲羅夜隨弋人臥茅屋
賣身不直程將軍却與彭越俱策勲解衣戲入玉壺底
壺中別是一乾坤水精鹽山兩岐麥身在椒蘭衆香國
玉條脫下澡凝脂金叵羅中酌瓊液平生學仙不學禪
剗心洗髓糟牀邊諸公俎豆驚四筵猶得留侯借箸前
昔為飛仙今酒仙更入太史滑稽篇

德壽宮慶壽口號

淳熙丙午元日聖上詣東朝慶壽八秩積陰頓晴飛
雪弄日聖孝昭格萬姓呼舞擬作口號

長樂宮前望翠華玉皇來賀太皇家青天白日仍飛雪
錯認東風轉柳花

春色何須羯鼓催君王元日領春回牡丹芍藥薔薇朶
都向千官帽上開

雙金獅子四金龍噴出香雲繞殿中太上垂衣今上拜

百王曾有箇家風

天父晨興未出房
君王忍冷立風廊
忽然鳴蹕珠簾捲
萬歲聲傳震八荒

甲戌王春試集英
小臣曾是老門生
蒼顏華髮班行裏
也聽鈞天九奏聲

題曹仲本出示譙國公迎請太后圖自肅天仗以
下皆紀畫也

德壽宮前春晝長
宮內花開宮外香
太皇頤神玉霄上

都人久不瞻清光
今晨忽見肅天仗
翠華黃屋從天降
一聲清蹕萬人看
天街冰銷樓雪殘
北來又有一紅繖
八鸞三駢金轂端
輦中似是瑤池母
鳳鳥霞裳剪雲霧
太皇望見天顏開
萬國春風百花舞
乃是慈寧太母回
鸞圖母子如初
千古無朔雲邊雪
旗脚濕御柳宮梅
寒影疎向來慈寧
隔沙漠倩雁傳書
雁難託迎還駝馭
彼何人魏武子孫
曹將軍將軍元是
一縫掖忽攘兩臂
挽五石長揖單于
如小兒奉歸慈輦
如折枝功蓋天下
只

戲劇笑隨赤松蠟雙屐飄然南山之南北山之北君不見岳飛功成不抽身却遣秦家丞相嗔

正月二十四日夜朱師古少卿招飲小樓看燈

光射琉璃貫水精玉虹垂地照天明風流誰似朱夫子
解放元宵過後燈

南北高峰醒醉眸市喧都寂似巖幽君言去歲西湖雨
城外荷聲到此樓

和章德茂少卿拉館學之士四人訪王德修提幹

之作

西玉南金價則同帝城相對落花風人如天上珠星聚
談到尊中竹葉空白紵烏紗青寶玦紫鸞黃鵠碧梧桐
千齡此遇還孤往恨殺燈前欠老翁

送何一之右司出守平江

十年一別再重遊又見魚書拜徹侯人物只今何水部
風流不減韋蘇州白蘋洲上春傳語烏鵲橋邊草喚愁
報政不應遲五月鶯花紫禁竚歸舟

招陳益之李兼濟二主管小酌益之指蠶豆云未
有賦者戲作七言蓋豌豆也吳人謂之蠶豆云
翠莢中排淺碧珠甘欺崖蜜軟欺酥沙瓶新熟西湖水
漆榼分嘗曉露腴味與櫻梅三益友名因蠶繭一絲絢
老夫稼圃方雙學譜入詩中當稼書

初夏清曉赴東宮講堂行經和寧門外賞花市

剝雨殘風一向顛花枝酒殘雨無緣忽逢野老從湖上
擔取名園到內前芍藥截留春去路鹿蔥邀上夏初天

衆紅半霎聊經眼不枉皇州第二年

蚤謁景靈宮聞子規

帝里都無箇裏寬苑深地禁到應難蔚然綠樹去天近
上有子規啼月殘便覺恍如還故里不知聞處是長安
野薔薇發桐花落孤負南溪老釣竿

以六一泉煮雙井茶

鷹爪新茶蟹眼湯松風鳴雪兔毫霜細參六一泉中味
故有涪翁句子香日鑄建溪當退舍落霞秋水夢還鄉

何時歸上滕王閣自看風爐自煮嘗

西府直舍盆池種蓮

飛空天鏡墮莓苔玉井移蓮旋旋栽坐看一花隨手長
揆開半葉出頭來稍添菱荇相縈帶便有龜魚數往回
剩欲遶池三兩匝數聲排馬苦相催

西府寒泉汲十尋深澆淺灑碧森森高花已照紅粧鏡
小蒼新抽紫玉簪鈿破尚餘新雨恨繖疎纔作半池陰
西湖瘦得如盆大更伴詩人恐不禁

大音
情

陳蹇叔郎中出閩漕別送新茶李聖俞郎中出手

分似

頭綱別樣建溪春
小璧蒼龍浪得名
細瀉谷簾珠顆露
打成寒食杏花錫
鷗斑碗面雲縈字
兔褐甌心雪作泓
不待清風生兩腋
清風先向舌端生

跋尤延之左司所藏光堯御書歌

光堯太上皇帝御書西漢書列傳目上有璽文曰帝
錄臣袞得之以示臣萬里謹拜手稽首作歌敬書于

後

鸞臺長史老野僧月前病鶴霜後蠅文書海裏衮不了
黑花亂發雙眼睛故人同舍尤太史敲門未揖心先喜
袖中傾下十斛珠五色光芒射牕几自言天風來帝旁
拾得復古殿中雲一張向來太上坐朝罷勝日光風花
柳暇浣花叢裏冰雪容宣城鷄距針芒鋒天顏有喜聊
小試西京書目供遊戲韓彭衛霍欣挂名舒向卿雲感
書字漢廷多少失意人九京寸恨不作塵一朝翻入聖

筆底昭回之光喚渠起小臣濫巾縫掖行手抄孝經不
徹章何曾下筆寫史漢再拜恭覽汗透裳太史結廬伴
鷗鷺錫山山下荆溪渡紅光紫炁燭天衢箇是溪藏寶
書處

送張定叟

紫巖衣鉢付南軒介弟曾同半夜傳師友別來真夢耳
江湖相對各潸然但令門戶無遺恨何必功名在早年
君向瀟湘我閩粵寄書只在寄茶前

時予方上
章乞閩漕

行路難

君不見河陽花今如泥土昔如霞君不見武昌柳春作
金絲秋作帚人生馬耳射東風柳色桃花不長久秦時
東陵千戶侯華蟲被體腰蒼璆漢初沛邑刀筆吏折腰
如磬頭搶地蕭相厥初謁邵平中庭百拜百不應邵平
後來謁蕭相故侯一拜一惆悵萬事反覆何所無二子
豈是大丈夫窮通流坎皆偶爾搏扶未必賢槍榆華胥
別是一天地醉鄉何曾有生死儂欲與君歸去來千愁

萬恨付一杯

冬至節後賀皇太子及平陽郡主

長樂鐘聲遶夢驚
建章星影照人行
千官燈語聽殘點
一夜霜寒在五更
金鑰玉帛開北闕
銀鞍絲控謁東明
青宮朱邸環天極
五色祥雲覆帝城

跋張功父通判直閣所惠約齋詩乙藁

句裏勤分似燈前得
細嘗孤芳後山種
一瓣放翁香苦處
霜爭溫臞來鶴較強
不應窮活計公子也忙忙

送趙民則少監提舉

座主門生四十年江湖契濶幾風煙
同朝再接駕行裏握手相看鶴髮前
誤喜論詩追舊事不知呼酒是離筵
老懷只作還山夢輸與先生早著鞭

上巳同沈虞卿尤延之王順伯林景思游春湖上
隨和韻得絕句呈諸同社

鵲袍林裏過芳辰聞道春來不識春
及至識春春已老于中更老是詩人

揔宜亭子小如拳着得西湖不見痕湖上軒窗無不好
何須抵死揀名園

天色鬢鬆未肯收吾儕自樂不曾愁隨宜旋旋商量着
晴即行行雨即休

籃輿休上馬休騎溼却青鞋也不辭揀取雨絲疎處去
攜筇且謁水仙祠

雨催杖履却須回捲上疎簾眼頓開十里湖光平似鏡
柳梢梢上一船來

岸上湖中各自奇
山鴈水鴈兩皆宜
只言游舫渾如畫
身在畫中元不知

景靈宮聞子規

今年未有子規聲
忽向宮中樹上鳴
告訴落花春不管
裴回曉月恨難平
斜風細雨又三日
柳絮浮雲空一生
豈不懷歸歸未得
倩渠傳語故園鶯

趙達明太社回于四月一日招游西湖

畫舫侵晨繫柳枝
主人生怕客來遲
嬌雲嫩日無風色

幸是湖船好放時

御池水滿苑門開泥帶飛花路帶苔
到得孤山翻作惡
海棠開日不曾來

走筆送濟翁胞弟特往浙東謁丘宗卿

若見丘遲問老夫為言臞似向來臞
更將雙眼寄吾弟
帶去稽山看鑑湖

題水月寺寒秀軒

古寺深門一徑斜繞身縈面總烟霞
低低簷入低低柳

小小盆栽小小花經藏中間看佛畫竹林外面是人家
山僧笑道知儂渴其實迎賓例瀹茶

題劉寺僧房

曾醉山間金叵羅山應識我我懷它頓添花竹明松檜
依舊菰蒲暗芰荷試問錦屏無恙否向來梅樹已無多
未須看遍新亭榭勝日重來一一過

送林子方直閣秘書將漕閩部

梅花園裏荔枝村頗記張燈作上元一別頻蒙訪生死

七年再見叙寒溫屬當閔雨祈羣望不得臨風共一尊
誰為君王留國士吾衰猶擬叫天閭

亦聞小泊贊公房清曉扶藜叩上方君與一僧游別嶂
我行百匝造長廊風巾霧屨來雲外雪檜霜松滿袖香
政是炎官張火傘不應多取海山涼

木樨初發呈張功甫

塵世何曾識桂林花仙夜入廣寒溪移將天上衆香國
寄在梢頭一粟金露下風高月當戶夢回酒醒客聞砧

詩情惱得渾無賴不為龍涎與水沉

又和

老子江西有故林萬松圍裏桂花深憶曾風露飄寒粟
自領兒童拾落金割蜜旋將揉作餅擣香須記不經砧
一枝未覺秋光減燈影相看萬籟沉

題徐衡仲西窗詩編

江東詩老有徐郎語帶江西句子香秋月春花入牙頰
松風澗水出肝腸居仁衣鉢新分似吉甫波瀾并取將

嶺表舊遊君記否荔枝林裏折桄榔

題吳夢與古樂府

金麥褰帷銀蒜鉤水光殿後月華樓
鶯歌花笑柳起舞何處人間更有愁
吳郎那得吳宮語夢裏爭羅人道許
低紅揜翠曲未終小兒索飯啼門東

買菊

老夫山居花繞屋南齋杏花北齋菊
青春二月杏花開抱瓶醉臥錦繡堆
涼秋九月菊花發自折寒枝插華髮

湘纍落英曾幾何陶令東鄰未見多
吾家滿山種秋色黃金為地香為國
就中更有一丈黃霜葩月藍耿出墻
飲徒無酒尋不得尋得一身花露香
如今小寓咸陽市有口何曾問花事
百錢擔上買一株聊伴詩人發幽意
再和謝朱叔正機宜投贈獎及南海集之句

重陽風雨不全篇春草池塘豈滿編
好句誰言較多少古人信手斲方圓
自慚下下中中語祇合休休莫莫傳
珍重銀鈎揮玉唾竟無瑤報只空然

和張功甫夢歸南湖

一生兩事苦相關從仕居貧併作難
顧我雪穿行腳襪羨君身作在家官
曉分京兆月半壁夕問南湖水幾竿
桃李能言春滿座向人猶自訴霜寒

張功甫請祠甚力簡以長句

老夫不及朱師古納却太常少卿得潼府
老夫不及張約齋乞得華州仙觀名雲臺
金印如斗牀滿笏富貴何曾膏白骨
一世窮忙為阿誰終日逢人皺兩眉
賣身長

鬚仍赤脚忍向墻間乞東郭添丁德曜喜欲顛孤竹一
簞真箇錯張君有宅復有田朱君歸去無一錢老夫老
矣不歸去五柳先生應笑汝

利州路提刑秘書張季長送洮研發視乃一段柏
木也作詩謝之

繡衣使者凜霜威方丈仙人舊羽儀別去十年真一夢
書來萬里寄相思如何綠石涵風面化作青銅溜雨枝
却送新詩報嘉惠偷兒當不要新詩

送德輪行者

瀝血抄經奈若何十年依舊一頭陀
袈裟未著愁多事着了袈裟事更多

題畢少董繙經圖

畢敷文少董名良史紹興初陷敵境居汴閉戶著春秋
正辭論語探古書有宋哲夫李願良輩執經師之
好事者寫為繙經圖宋執一卷背立且讀且指李執
一卷向其師若有問者而少董坐一榻上後有二女

奴各有所執而阿冬者坐其間少董之季子也女奴之髻者曰孫壽冠者曰馬惠真哲夫名成願良名師魏云

宋生把卷讀且指李生把卷問奇字榻上坐着一老子右手秉筆袒左臂春秋論語訓傳成習中有話頗欲告兩生欲呼小白拉重耳同討不庭尊帝京婢妾不解事兩生未可語冬郎政兒癡誰能復憐許繙經未了報歸期攜書歸來獻玉墀塵沙滿面無人識回首兩生斗南

北

戊申元日立春題道山堂前梅花

今年元日不孤來帶領新春一併回夜雨初添石渠水
東風先入道山梅不妨數朶且微破未要十分都放開
江路野香原自好阿誰攜取種蓬萊

龍山送客

念念還鄉未得還偶因送客到龍山分明認得西歸路
只是回車却入關

跋王順伯所藏歐陽集古錄序真蹟

遂初欣遇兩詩伯臨川先生一禪客三人情好元不疎
祇是相逢逢不得渠有貞觀碑儂有永和詞真贋爭到
底未說妍與媸珊瑚擊得如粉碎趙壁博城翻手悔不
似三家鬪斷碑夜戰半酣莫先退皇朝愛碑首歐陽集
古萬卷六一堂玄圭漆玉堆墨寶點霜黑水塗緇裳臨
川無端汲古手席卷歐家都奄有岫山科斗不要論嶧
山野火不經焚尤家沈家喙如鐵未放臨川第一勲不

知臨川何許得尤物集古序篇出真筆遂初心妬口不
言君看跋尾猶悵然

遂初欣遇尤延之沈虞卿自號也
二公與順伯皆喜收碑刻各自誇

尚

和張功父梅詩

今歲柴車總未巾孤山龍井不曾行老無半點看花意
遮莫明朝雨及晴

約齋句子已清圓更賦梅花分外妍不飲銷金傳玉手
却來嚙雪聳詩肩

要與梅花巧鬪新恨無詩句敵黃陳約齋詩好人仍好
不怕梅花賽却人

夢種菜

予三月一日之夜夢遊故園課僕夫種菜若秋冬之
交者尚有菊也夢中得菜子菊花一聯覺而足之

背秋新理小園荒過雨畦丁破塊忙菜子已抽蝴蝶翅
菊花猶著鬱金裳從教蘆葍專車大早覺蔓青撲鼻香
宿酒未消羹糝熟析醒不用蔗為漿

春雨呈袁起巖

昨日晴暄盡十分無端寒濕復今晨
蒼顏華髮差排老
急雨顛風屏當春只有觀書堪遣日
從來病眼不如人
詩名滿世真何用更賺先生願卜鄰

謝張功父送牡丹

病眼看書痛不勝落花千朵喚雙明
淺紅醲紫各新樣
雪白鵝黃非舊名擡舉精神微雨過
留連消息嫩寒生
蠟封水養松窗底未似瑯欄倚半醒

三衢登舟午睡

午思昏昏不肯醒
倦投竹枕睡難成
曉然有夢疑非夢
聽得人聲及水聲

曉泊蘭溪

金華山高九天半
夜雪裝成珠玉案
蘭溪水清千頃強
朔風凍作琉璃缸
日光雪光兩相射
病眼看來忘南北
恨身不如波上鷗
脚指為楫身為舟
恨身不如沙上雁
蘆花作家梅作伴
折綿冰酒未是寒
曉寒真欲冰我肝

急閉窮蓬擁爐去竹葉梨花十分注

蘭溪解舟

只愁灘淺閣行舟到得江深又不流水鳥避人飛不徹
看他沒去看他浮

和陳蹇叔郎中乙巳上元晴和

御柳梢頭晚不風官梅面上雪都融如何閭闔新春夜
頓有芙蓉滿眼紅十里沙河人最鬧三千世界月方中

買燈莫費東坡紙今歲鰲山不入宮

十四日晚有旨
徹禁中山棚

春寒早朝

十載江湖今又歸，朝雞不許夙興遲。
每聞撲鹿初鳴處，只是鬆鬟好睡時。
病眼生憎紅蠟燭，曉光來到碧桃枝。
誰能馬上追前夢，坐待金門放玉旄。

沈虞卿秘監招遊西湖

蘇公堤遠柳生煙，和靖園深竹映關。
舫入芰荷香處去，人從雲水國中還。
似寒如暖清和在，欲雨翻晴頃刻間。
能為蓬萊老仙伯，一杯痛快吸湖山。

送鄉僧德璘監寺緣化結夏歸天童山

七百支郎夜忍飢木魚閉口等君歸還山大衆空歡喜
只有誠齋兩首詩

答提點綱馬驛丞劉修武翰

解道征鴻數字秋清於雪碗映冰甌老來筆底心無毒
交割風光與子休

賀皇太子九月四日生辰

繼照姿天縱分陰學日勤橘中招綺夏瓜處屏佐文老

別魚竿月來依鶴禁雲還將古為鑑聊當野人片

和同年李子西通判

走馬看花拂綠楊曲江同賞牡丹香向來年少今俱老
君拜監州我作郎北闕小遲蒼玉佩南征聊製芰荷裳
病身只作家山夢徑菊詩葩兩就荒

九日即事呈尤延之

昨日茱萸未著香今朝籬菊頓然黃浮英泛蕊多多著
舊酒新醅細細嘗節裏且追千載事鬢邊管得幾莖霜

正冠落帽都兒態自笑狂夫老不狂

和周元吉左司夢歸之韻

半似清狂半白癡不須人笑我心知
煙霞平日真成癖山水中年却語誰
錯計浪隨雲出岫感君能遣雨催詩
居然喚起還家夢橘刺藤梢隔槿籬

送劉孔章縣尉得官西歸

早宴黃花詣粉闈晚按春草染朝衣
却提猛士弓彎月去埽封狐雪打圍
綠髻朱顏君勝我青春白日我思歸

何時共淪青原茗下看江鷗來去飛

雲龍歌調陸務觀

墨池揚子雲雲間陸士龍天憎二子巧言語只遣相別
無相逢長安市上忽再值向來一別三千歲王母桃花
落幾番北斗柄爛銀河乾雙鬢成絲絲似雪兩翁對面
面如丹借問別來各何向渭水東流我西上金印斗大
直幾錢錦囊山齊今幾篇詩家不愁吟不徹只愁天地
無風月君不見漢家平津侯東閣冠蓋如雲浮又不見

當時大將軍公卿推拜如星奔祇今雲散星亦散也無
鹿登臺榭羊登坟何時與君上廬阜都將硯水供瀑布
磨鎌更所扶桑樹擣皮作紙裁煙霧雲錦天機織詩句
孤山海棠今已開上巳未有遊人來與君火急到一回
一杯一杯復一杯管他玉山頽不頽詩名於我何有哉
再和雲龍歌留陸務觀西湖小集且督戰云

我願身為雲東野化為龍龍會入淵雲入岫韓子却要
長相逢作意相尋偏不值不知今年是何歲剡藤土板

贈一番廷珪烏丸矐未乾乃是故人陸浚儀詩骨點化
黃金丹謂宜天祿貯劉向不然亦合雲臺上却令去索
催租錢枉却清風明月三千篇夜裝明發走不徹半篙
刺碎嚴灘月老夫不願萬戶侯但願與君酒船萬斛同
拍浮老夫不怯故將軍但怯與君筆陣千里相追奔少
陵浣花舊時屋太白青山何處坟二仙死可埋丘阜二
仙生可著韋布名挂廣寒宮裏樹非烟非雲亦非霧長
使玉皇掉頭誦渠句詩府誰得玉芪開詩壇誰授黃錢

來留君不住君急回不道西出陽關無此杯西山金盆
儘渠頽斯游明日方懷哉

寒食雨中同舍人約遊天竺得十六絕句呈陸務
觀

遊山不合作前期便被山靈聖得知只等五更傾一雨
三更猶是月明時

笋輿衝雨復衝泥一徑深深只覺遲孤塢忽從雲外出
寺門漸近報儂知

住山何敢望他僧只是遊山也不曾可惜一條杉檜路
都將濕了不教行

破雨遊山也莫嫌却緣山色雨中添人家屋裏生松樹
穿出茅簷却覆簷

小溪曲曲亂山中嫩水濺濺一線通兩岸桃花總無力
斜紅相倚卧春風

老檜如幢翠接連山茶作堦綠縈纏山僧相識渾相忘
不到山中十五年

三峰小石一方池下有機泉仰面飛坐看跳珠復拋玉
忽然一噴與簷齊

清遠溪中小閘頭遮攔溪水不教流山僧為我放一板
濺雪奔雷怒未休

城裏哦詩枉斷髭山中物物是詩題欲將數句了天竺
天竺前頭更有詩

忽撚金絲嫋綺疏又驚寒食到來初不知折盡西湖柳
插遍長安萬戶無

禪房寂寂水潺潺
澗草巖花點綴間
忽有仙禽發奇響
頻伽來自補陀山

雨裏匆匆怨出郊
晴時不出却誰教
西湖北畔名園好
無數桃花只見梢

戶戶游春不放春
只愁春去不愁貧
今朝道是游人少
處處園亭處處人

若道尋春被雨催
如何隨處兩三杯
晚晴曉雨如翻手
有底虧儂不好來

萬頃湖光一片春何須割破損天真却將葑草分疆界
葑外垂楊屬別人

轎頂花枝儘鬧裝游人未暮已心忙無端更被千株柳
展取蘇堤分外長

跋陸務觀劔南詩藁二首

今代詩人後陸雲天將詩本借詩人重尋子美行程舊
盡拾靈均怨句新鬼嘯猿啼巴峽雨花紅玉白劔南春
錦囊繙罷清風起吹仄西窗月半輪

劍外歸來使者車
荆東新得左魚符
可憐霜鬢何人問
焉用詩名絕世無
彫得心肝百雜碎
依前塗轍九盤紆
少陵生在窮如蝨
千載詩人拜蹇驢

新晴讀樊川詩

江妃瑟裏芰荷風
淨埽癡雲展碧穹
嫩熟便嗔疎小扇
斜陽酷愛弄飛蟲
九千刻裏春長雨
萬點紅邊花又空
不是樊川珠玉句
日長淡殺箇衰翁

駕幸聚景晚歸有旨次日歇泊

身在長安夢故山故山未去且長安落紅滿地莫教掃
新綠隔牆聊借看竹葉勸人行樂事榴花為我遣春寒
賜休又得明朝睡不問三竿與兩竿

都下食筍自十一月至四月戲題

竹祖龍孫渭上居供儂樽俎半年餘斑衣戲綵春無價
玉版談禪佛不如若怨平生食無肉何如陋巷飯斯蔬
須庾韭元修菜喫到憎時始憶渠

醖醖

以酒為名却謗他冰為肌骨月為家借令落盡仍香雪
且道開時是底花白玉梢頭千點韻綠雲堆裏一枝斜
休休莫斷西莊柳放上松梢分外佳

南海陶令曾送水沈報以雙井茶二首

嶺外書來謝故人梅花不寄寄爐熏瓣香急試博山火
兩袖忽生南海雲苒惹鬚眉清入骨縈盈窗几巧成文
瓊琚作報那能辦雙井春風啜一斤

沈水占城第一良占城上岸更差強黑藏骨節龍筋瘡

斑出文章鷗翼張滾盡殘膏添猛火熬成熟水趁新湯
素馨熏染真何益畢竟輸他本分香

幼圃

蒲橋寓居庭有剗方石而實以土者小孫子藝花窠
菜本其中戲名幼圃

寓舍中庭劣半弓驚泥為圃石為墉瑞香萱草一兩本
蔥葉焯苗三四叢稗子落成小金谷蝸牛卜築別珠宮
也思日涉隨兒戲一逕惟看蟻得通

送周元吉顯謨左司將漕湖北

君詩日日說歸休，忽解西風一葉舟。
黃鶴樓前作重九，水精宮裏過中秋。
職親六閣仍金馬，喜入千屯看木牛。
繡斧光華誰不羨，一賢去國欠人留。

又見周郎攜小喬，武昌赤壁醉嬌嬈。
蜀江雪水來三峽，吳苑風煙訪六朝。
秋月春花出肝肺，新詞麗曲入笙簫。
歸來却侍金鑾殿，好看霜毫映珥貂。

彼此江湖漫浪翁，相逢逋宿省西東。
兩窮握手論詩後，

一笑投膠入漆中
臨水登山公別我
青鞋布襪我從公
貂裘已博江西艇
只待黃花半席風

送王季德提刑寶文少卿

寶儲依舊接英游
盪節何曾遠藻旒
卿月使星銀漢曉
繡衣綠服太湖秋
豺當道上狐何問
鷹擊霜前兔已愁
火急平反供一笑
紫荷玉笋待君侯

贈都下寫真葉德明

我昔山林人不識
或疑謫仙或狂客
仰看青天不看人

醉裏那知眼青白一攜破硯入長安素衣成緇綠髻斑
上林麒麟着野馬滄洲鷗鷺綴孔鸞漢官威儀既不入
貴人樣灞橋風雪又不見詩人相不須覽鏡照清溪我
亦自憎塵俗狀葉君着眼秋月明葉君下筆秋風生市
人請畫即唾罵只寫龍章鳳姿公與卿肯來為予寫衰
貌擲筆掉頭欣入妙相逢可惜遲十年不見詩翁昔年
少

送孫檢正德操龍圖出知鎮江

看花走馬紹興間彼此春風各少年黃甲諸儒今幾許
白頭同舍省東偏昨宵歸夢月千里餘債欠君詩兩篇
已乞閩山一窠闕老身只要早歸田

食雞頭子

三危瑞露凍成珠九轉丹砂鍊久如鼻觀溫芳炊桂歇
齒根熟軟剥胎餘半甌鷹爪中秋近一炷龍涎丈室虛
却憶吾廬野塘味滿山柿葉正堪書

新寒戲簡尤延之檢正

逗曉添衣併數重
隔晡剩熱尚斜紅
秋生露竹風荷外
寒到雲窗霧閣中
半點暄涼能幾許
古來豪傑總成空
木犀香殺張園了
雪臭金梭欠兩翁

跋姜春坊梅山詩集

松風澗水打窗聲
玉珮瓊琚觸眼明
當畫如何挂秋月
未春特地囀新鶯
只銷一卷梅山集
幻出多般景物情
老子平生有詩癖
為君焚却老陶泓

秋雨蚤作有歎

細雨簷無點安得更有聲如何却作泥亦能妨晨征宿
昔忽過暄心知非堅晴何須暄晴極然後寒雨生寒生
使人覺妙物亦何曾翦翦自神妙無乃與物矜造物本
非作觀者或強名老夫近稍聾此事無暇聽平生感秋
至此意今已平獨念老病身頗不耐風興何時歸故園
晏眠閉柴荆鳴雞亦不留好夢無吾驚他年憶此時惘
如宿酒醒思歸已可喜而况真歸耕

寄題曾子與競秀亭

老夫上下蓼花灘每過君家輒繫船尊酒燈前山入座
孤鴻月底水連天暄涼書問二千里場屋聲名三十年
競秀主人文似豹不應霧隱萬峰邊

赴文德殿聽麻仍拜表

蒼龍觀闕啓槐宸白玉堦除振鷺羣仗外諸峰獻松雪
霜前一雁度宮雲舍人就日宣麻制丞相瞻天進表文
夙退自欣還自笑素餐便當策殊勲

紫宸殿拜表賀雪

稍緩鳴鞭不住催一聲再拜忽如雷封章進了儀曹退
文武班齊上相來白髮兩年陪賀雪紫衣數輩小傳杯
賜休退食端何恨未到西湖探早梅

立春後一日和張功父園梅未花之韻

前夕三更月落時東風已動萬花知江梅端合先交割
春色如何未探支只欠梁溪水柱句追還和靖暗香詩
張家剩有蔥根指不把瓊酥滴一枝

人日出遊湖上

去時數點雨歸時數片雪
雨雪兩不多山路雙清絕
城中雪一尺山中雪一丈
地上都已消却在松梢上
去歲遊春履苔痕故可尋
人家隨岸遠塏影落湖深

寄題劉成功錦里

嘉林市中塵一丈嘉林寺後竹千竿
先君授徒竹窻底我初識君俱少年
同師同舍同筆硯火冷燈青飛雪片
春風一夜吹林花南北飄零各星散
我今頭白苦思歸羨君山園芋栗肥
為君題作小錦里君應一笑巾墮几

讀淵明詩

少年喜讀書晚悔昔草草迨今得書味又恨身已老淵
明非生面穉歲識已早極知人更賢未契詩獨好塵中
談久睽暇處目偶到故交了無改乃似未見寶貌同覺
神異舊翫出新妙琬空那有痕滅跡不須埽腹腴八珍
初天巧萬象表向來心獨苦膚見欲幽討寄謝穎濱翁
何謂淡且稿

送姜夔堯章謁石湖先生

釣璜英氣橫白蜺
欬唾珠玉皆新詩
江山愁訴鴛為泣
鬼神露索天洩機
彭蠡波心弄明月
詩星入腸肺肝裂
吐作春風百種花
吹散瀕湖數峰雪
青鞋布襪軟紅塵
千詩只博一字貧
吾友夷陵蕭太守
逢人說項不離口
袖詩東來謁老夫
慙無高價當璫璵
翻然却買松江艇
徑去蘇州參石湖

林景思寄贈五言以長句謝之

華亭沈虞卿惠山尤延之每見無雜語只說林景思試

問景思有何好佳句驚人絕倒句句飛從月外來可
羞王公薦穹昊若人乘雲駕天風秋衣剪菊裁芙蓉暮
宿銀漢朝蓬宮我欲從之東海東西湖柳色二三月相
逢一笑冠纓絕醉招和靖叫東坡一吸西湖湖水竭我
醉自眠君自顛路人往往指作仙此輩何曾識此樂識
與不識俱可憐別時花開今已落思君令人瘦如鶴夢
裏隨君攜酒瓢同登天台度石橋瀑布界天瀉雲窟長
松拔地攬煙霄與君聯句章未了帝城鐘動西峰曉海

風吹墮珊瑚枝乃是先生寄我詩
火雲燒江江水沸君詩清涼過於水
定知來自雪巢底恍然坐我天台寺

寄題劉凝之墳山壯節亭用轆轤體

見了廬山想此賢此賢見了失廬山
胷中書卷雲凌亂身外功名夢等閒
一點目光牛背上五絃心在雁行間
欲吟壯節題崖石筆挾風霜齒頰寒

賀皇太子九月四日生辰

典學光陰璧不如簡編燈火卷還舒
極知儲后勤稽古

却是儒生懶讀書心到帝王圖籍外手追雅頌國風初
人間未見瑤山集十倍曹丕尚有餘

和袁起巖郎中投贈七字

故人一別兩相思不但平生痛飲時曾次五三真事業
筆端四六更歌詩閉門覓句今無已刻意傷春古牧之
卧雪高人家譜在春風政著紫蘭枝

宋詩鈔卷七十五